

# Selamatkan alam usaha tiada noktah

**M**EMELIHARA dan memulihara alam sekitar terutamanya litupan hijau dalam negara merupakan suatu usaha yang berterusan serta tidak ada noktahnya.

Selagi terdapat tangan-tangan tamak yang lebih mengutamakan kepentingan diri, selama itu isu kemusnahan alam sekitar akan berterusan.

Pelbagai usaha telah dilaksanakan oleh agensi-agensi kerajaan, badan-badan swasta, individu serta pertubuhan bukan kerajaan (NGO) namun kesedaran dalam kalangan masyarakat kita masih rendah.

Menurut pensyarah kanan, Jabatan Biologi, Fakulti Sains, Universiti Putra Malaysia (UPM), **Prof. Dr. Ahmad Ismail**, ramai dalam kalangan rakyat negara ini tahu akan kepentingan memelihara alam sekitar, namun tidak menganggap isu tersebut begitu penting buat mereka.

Beliau yang juga Naib Presiden Persatuan Pencinta Alam Malaysia (MNS) berkata apabila berdepan dengan pilihan di antara usaha untuk menyelamatkan alam sekitar dan kepentingan diri, rata-rata masyarakat hari ini memilih untuk mengabaikan isu alam sekitar.

"Hanya apabila kita mengalami bencana alam baharulah tersedar, menuding jari menyalahkan sesama sendiri, jika tidak kita hanya melihat kemudian memejamkan mata berdiam diri.

"Masyarakat sebenarnya adalah antara golongan yang begitu rapat dengan alam sekitar, jika berlaku sebarang kemusnahan alam mereka boleh bertindak memberi maklumat, menjadi mata dan telinga kepada pihak berkuasa," katanya.

Beliau berkata demikian ketika di temui selepas menyampaikan syarahan umum bertajuk **Perlindungan dan Konservasi Kepelbagaian Bio: Isu Yang Berterusan**, di UPM, Serdang, Selangor baru-baru ini.

Dalam syarahan tersebut, Dr. Ahmad banyak memaparkan kajian kes dan berkongsi pengalamannya dalam menjalankan aktiviti perlindungan dan konservasi alam sekitar.

Ujarnya, golongan muda yang berminat pada hari ini perlu meneruskan usaha-usaha tersebut dengan lebih lagi.

"Masih banyak kajian mendalam perlu dilaksanakan dan anda (golongan muda) perlu melaksanakannya dengan penuh minat.

"Kajian-kajian yang dilakukan oleh saya atau mana-mana pengkaji lain perlu diteruskan dan diperhalusi agar maklumat yang diperolehi makin bertambah dan dapat diguna bagi menyelamatkan alam sekitar," katanya.

Dr. Ahmad mengambil contoh kajian tentang habitat tidak kira di mana juga, merupakan antara kajian yang amat penting dilaksanakan agar masyarakat dapat faham dengan baik sebelum proses pemeliharaan dan pemuliharaan

Saya juga memohon agar orang ramai dan masyarakat untuk terus menyokong aktiviti yang dilaksanakan selain meneruskan kajian dalam penyelidikan sekali gus menjadi pakar dalam satu-satu bidang."

dapat dilaksanakan dengan baik.

"Kajian tentang habitat telah lama dilaksanakan, terutamanya habitat yang sensitif seperti di taman-taman negeri dan negara yang telah digazetkan oleh Jabatan Perlindungan Hidupan Liar dan Tanah Negara (Perhilitan)," katanya.

Kawasan habitat sensitif ini merupakan antara kawasan penting hidupan liar untuk membiak, mencari makanan dan berlindung.

"Kawasan-kawasan seperti inilah yang perlu dilindungi, jangan diganggu bagi memastikan segalanya dikembalikan namun pada masa yang sama kajian perlu dilakukan.

Sebagai contoh kajian bagi mengetahui mengapakah harimau belang semakin kurang, katakan disebabkan kekurangan rusa sebagai makanannya, mengapa rusa boleh berkurangan, akibat diburu pemburu haram dan seterusnya," katanya.

Apabila punca sesuatu masalah itu diketahui secara mendalam dan difahami, proses pemuliharaan dan pemeliharaan akan menjadi lebih mudah.

Kata beliau, golongan muda masa kini perlu melihat dengan lebih serius, tetapkan minda dan fikir apa yang perlu dilakukan bagi menyambung usaha yang telah dilakukan sebelum ini.

"Saya juga memohon agar orang ramai dan masyarakat untuk terus menyokong aktiviti yang dilaksanakan selain meneruskan kajian dalam penyelidikan sekali gus menjadi pakar dalam satu-satu bidang," katanya.

Program pemerhatian burung yang diadakan dalam kalangan pelajar contohnya perlu difokuskan kepada corak pemakanan, bagaimana ia membiak, bergaul dan bersosial sesama mereka.

Apabila segala tingkah laku dan keperluan sesuatu spesies itu diketahui, proses konservasi dan perlindungan terhadapnya lebih mudah untuk dilaksanakan.

Pendidikan dan kesedaran awam yang bermula sedari di bangku sekolah amat penting. Bermula daripada guru, anak murid, ibu bapa seterusnya maklumat dan kesedaran tersebut akan terus berkembang.



DR. AHMAD ISMAIL